

NAQQIUT

Taarserpaa akissuteqaat 7. maj 2026-meersoq
(UPA2026/136-p UPA2026/105-llu ataatsimut siullermeerneqartussaagaluit UPA2026/105-ip
tunuartinneqarnerata kingunerisaanik allannguisoqarpoq, naqqiutillu kingulliup
nassiunneqarnerata kingorna annikitsumik iluarsiiisoqarpoq.)

Nunatta kangianut tulluarsakkamik ilinniarfimmik, Tasiilami inissinneqartussamik pilersitsinissaq pillugu Naalakkersuisut siunnersuusiornissamik peqquneqarnissaannik Inatsisartut aalajangiiffigisassaattut siunnersuut. Ilinniarfik assigiinngisitaartumik ilinniarfullunilu piginnaasaqalerfiunissaa tunngavigineqassaaq. Siunnersuut UPA2027-mi saqqummiunneqassaaq.

(Inatsisartunut ilaasortaq Nivi Rosing, Inuit Ataqtigiit)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Inatsisartuni ilaasortaq Nivi Rosing Inuit Ataqtigiit, siunnersuuteqarneranut Naalakkersuisut sinnerlugit qujaffigaara.

Siunnersuutigineqartoq Tasiilami ilinniarfimmik pilersitsinissamik siunertaqarpoq najukkamilu pissutsinik, pisariaqartitanik piginnaasanillu aallaaveqarluni ilinniarnissamik neqerooruteqartalernissamat ineriartortitsinissaq siunertarineqarluni. Tasiilami Tunumilu ilinniarnissamik periarfissat annertusarneqarlutillu periarfissaalernissaanik kissaateqartoqarnera Naalakkersuisunit eqqumaffigineqarpoq.

Taamaattumik Naalakkersuisut kissaateqarput Tasiilami ilinnarfiusinnaasunik misissuineq aallartissasoq, ilutigalugulu pilersitsinissaanissamat tunngatillugu aalajangertoqartinnagu pisariaqartitsinerup sukumiisumik qulaajaqqissaarnissaa kissaatigalugu, misissuinerullu inerneru UKA2027-mi saqqummiunneqarsinnaanissaat naatsorsuutigineqarluni.

Pisariaqartitsisoqarneranik tamakkiisumik misissuqqissaarnikkut siunissami suliniutissat paasissutissanik eqqortunik tunngaveqarluni Tasiilamilu ilinniartitaanerit sammivissaat, pikkorissartarnissanut pisariaqartitsinerit, sullinniakkat siunniussat aqqissugaanissaalu eqqarsaatigalugit pisariaqartitat aallaavigalugit qulakkeerneqarsinnaapput. Tamatumunnga atatillugu Naalakkersuisut isumaqarput ilinniarfimmik aalajangersimasumik pilersitsinissaq kisiat pinnagu siammasinnerusumik ilinniarnissamat pisariaqartitat assigiinngitsut periarfissallu ataatsimoortillugit paasiniarneqarnissaat naapertuuttusoq.

Tassunga atatillugu siammasinnerusumik tamakkiinnerusumillu ilinniarnissamat pisariaqartitat, taakkualu ilusissai periarfissaalu, kiisalu ineriartornissamat periarfissat assigiinngitsut ataatsimut isigineqarnissai pissusissamisussasoq Naalakkersuisut isumaqarput, taamaalilluni immikkut ilinniarfissap ataatsip pilersinneqarnissaanik misissuinerinnaanani.

Pisariaqartitsinerup misissoqqissaarnerani aalajangiiffigisassatut siunnersuutit aallaavigineqassapput, taamaattorli Tasiilami tamakkiisumik siunissarlu ungasinnerusooq isigalugu pisariaqartitat aallaavigalugit aalajangiiffigisassatut siunnersuusiortoqassalluni.

Pisariaqartitsinerup misissoqqissaarnerani makku ilaatigut ersersinniarneqassapput:

- Tasiilami massakut siunissamilu ilinniagassatut neqeroortigineqartartut
- Ilinniakkanik assigiinngitsunik ilinniartoqarsinnaanissamullu periarfissat pisariaqartitsinerlu
- Ilinniakkat assigiinngitsut naleqquttut qaffasissusissaallu
- najukkami ilinniartitsinissamik periarfissaasut saniatigut ungasianiit ilinniartitsinnaanerit qarasaasi allu atorlugit aaqqiissuteqarsinnaanerit misissornissaat
- periarfissat assigiinngitsut eqqarsaatigalugit aningaasatigut allaffissornikkullu sunniutissat
- ilinniarfioreersunik suleqateqarsinnaanissamut periarfissat

Misissueqqissaarnerup tamakkiisup siunissami suliniutaasinnaasut piujuartitsisumik ingerlanneqarnissaat kiisalu najukkami ataasiakkaani naleqqussarnissaanut qulakkeerinnissaat.

Siunnersuuteqartup siunnersuutigaa Naalakkersuisut UPA2027-mi saqqummiunneqartussamik Tasilaami ilinniarfimmik pilersitsinissamik siunnersuummik saqqummiussissasut. Pilersitsinissamut siunnersuusiortoqartinnagu Naalakkersuisut sukumiisumik aalajangernissamut tunngavissaqartariaqarput.

Taamaattumik Naalakkersuisut ima allannguutissatut siunnersuummik saqqummiippat: ”Tasiilami ilinniarfimmik pilersitsinnaanissamut pisariaqartitsineq pillugu nalunaarusiamik UPA2027-mi saqqummiunneqartussamik Naalakkersuisut suliaqarnissamut Inatsisartut aalangiiffigisassaattut siunnersuut”.